

七十二家集

梁武帝御製集卷之六

梁高祖武皇帝蕭衍著

詔

贈柳慶遠詔

念往篤終前王令則式隆寵數列代恒規使持  
節都督雍梁南北秦四州郢州之竟陵司州之  
隨郡諸軍事安壯將軍寧蠻校尉雍州刺史雲  
杜縣開國侯柳慶遠器識淹曠思懷通雅爰初  
草昧預屬經綸遠自升平契濶禁旅重牧西藩

方弘治道奄至殞喪傷慟於懷宜追榮命以彰  
茂勲可贈侍中中軍將軍開府儀同三司鼓吹  
侯如故謚曰忠惠賻錢二十萬布二百匹

贈王茂詔

旌德紀勲哲王令軌念終追遠前典明誥故使  
持節散騎常侍驃騎將軍開府儀同三司江州  
刺史茂識度淹廣器宇凝正爰初草昧盡誠宣  
力綢繆休戚契濶屯夷方賴謀猷永隆朝寄奄  
至薨殞朕用慟於厥心宜增禮數式昭盛烈可  
贈侍中太尉加班劍二十人鼓吹一部謚曰忠  
烈

追封蕭穎胄詔

念功惟德列代所同追遠懷人彌與事篤齊故  
侍中丞相尚書令穎胄風格峻遠器寓深邵清  
猷盛業問望斯歸締構義始肇基王迹契濶屯  
夷載形心事朕膺大改物光宅區宇望岱觀河  
永言號慟可封巴東郡開國公食邑三千戶本  
官如故

贈范雲詔

追遠興悼常情所篤况間望斯在事深朝寄者  
乎故散騎常侍尚書右僕射霄城侯雲器範貞  
正思懷經遠爰初立志素履有聞脫巾來仕清  
績仍著爰務登朝具瞻惟允綢繆翊贊義簡朕  
心雖勤非負勒而舊同論講方騁遠塗未毗庶  
政祗致喪殞傷悼于懷宜加命秩式備徽典可  
追贈侍中衛將軍僕射侯如故并給鼓吹一部

贈袁昂詔

侍中特進左光祿大夫司空昂奄至薨逝惻然  
于懷公器宇凝素志誠貞方端朝燮理嘉猷載  
緝追榮表德寔惟令典可贈本官鼓吹一部綵  
東園祕器朝服一具衣一襲錢二十萬絹布一  
百疋蠟二百斤卽日舉哀

贈蔡道恭詔

持節都督司州諸軍事平北將軍司州刺史漢  
壽縣開國伯道恭器幹詳審才志通烈王業肇  
構致力陝西受任邊垂効彰所蒞寇賊憑陵竭  
誠守禦奇謀間出捷書日至不幸抱疾奄至殞  
喪遺略所固得移氣朔自非徇國忘已忠果並  
至何能身沒守存窮而後屈言念傷悼特兼常  
懷追榮加等抑有恒數可贈鎮西將軍使持節  
都督刺史伯如故并尋購喪櫬隨宜資給



贈張惠紹詔

張惠紹志略開濟幹用貞果誠懃義始績聞累  
任爰居禁旅盡心朝夕奄至殞喪惻愴于懷宜  
追寵命以彰勲烈可贈護軍將軍給鼓吹一部  
布百疋蠟二百斤給日忠

贈鄭紹叔詔

追往念功前王所篤在誠惟舊異代同規通直  
散騎常侍右衛將軍東興縣開國侯紹叔立身  
清正奉上忠恪契濶藩朝情績顯著爰及義始  
寔立茂勲作牧疆境効彰所蒞方卑任寄協贊  
心膺奄至殞喪傷痛於懷宜加優典隆茲寵命  
可贈散騎常侍護軍將軍給鼓吹一部東園祕  
器朝服一具衣一襲凶事所須隨由資給謚曰  
忠

贈馮道根詔

豫寧縣開國伯新除散騎常侍領左軍將軍馮  
道根奉上能忠有功不伐撫人留愛守邊難犯  
祭遵馮異郭伋李牧不能過也奄致殞喪惻愴  
于懷可贈信威將軍左衛將軍給鼓吹一部賻  
錢十萬布百疋謚曰威

贈呂僧珍詔

思舊篤終前王令典追榮加等列代通規散騎  
常侍領軍將軍平固縣開國侯僧珍器思淹通  
識宇詳濟竭忠盡禮知無不爲與朕契濶情兼  
屯忝大業初構茂勲克舉及居禁衛朝夕盡誠  
方參任台槐式隆朝寄奄致喪逝傷慟於懷宜  
加優典以隆寵命可贈驃騎將軍開府儀同三  
司常侍鼓吹侯如故給東園祕器朝服一具衣  
一襲喪事所須隨由備辦謚曰忠敬侯

贈昌義之詔

護國將軍營道縣開國侯昌義之幹畧沈濟志  
懷寬隱誠著運始効彰邊服方申爪牙寄以禁  
旅奄至殞喪惻愴于懷可贈散騎常侍車騎將  
軍并鼓吹一部給東園祕噐朝服一具賻錢二  
萬布二百疋蠟二百斤謚曰烈

贈張弘策詔

亡從舅衛尉慮發所忽殞身祔豎其情理清貞  
器識淹濟自藩升朝契濶夷阻加外氏凋衰饗  
嘗屢絕興感涓陽情寄斯在方賴忠勲翼宣寡  
薄報効無徵永言增慟可贈散騎常侍車騎將  
軍給鼓吹一部謚曰愍

追贈張弘籍詔

亡舅齊鎮西參軍素風雅猷夙有名輩降年不  
永早世潛輝朕少離苦辛情地彌切雖宅相克  
成輅車靡贈興言永往觸目慟心可追贈廷尉  
卿

贈孔休源詔

慎終追遠歷代通規哀德疇庸先王令典宣惠  
將軍金紫光祿大夫監揚州孔休源風業貞正  
雅量冲邈升榮建禮譽重摺紳理務神州化覃  
歌詠方興仁壽穆是藝倫奄然永逝倍用悲惻  
可贈散騎常侍金紫光祿大夫贈第一材一具  
布五十疋錢五萬蠟二百斤尅日舉哀喪事所  
須隨便資給謚曰貞子



贈蕭子顯詔

仁威將軍吳興太守子顯神韻峻舉宗中佳器  
分竹未久奄到喪殞惻愴于懷可贈侍中中書  
令今便舉哀

贈裴子野詔

鴻臚卿領步兵校尉知著作郎兼中書通事舍  
人裴子野文史足用庶自自居劬勞通事多歷  
年所奄致喪逝惻愴空懷可贈散騎常侍賻錢  
五萬布五十疋卽日舉哀謚曰貞子

贈顧協詔

員外散騎常侍鴻臚卿無中書通事舍人顧協  
廉潔自居白首不衰久在省闈內外稱善奄然  
殞喪惻怛之懷不能已已傷無近親彌足哀者  
大殮旣畢卽送其喪柩還鄉并營家槨並皆資  
給悉使周辦可贈散騎常侍令便舉哀謚曰溫  
子

贈周檢詔

太子詹事豫州大中正檢奄至殯喪惻愴于懷  
其學思堅明志行開敏劬勞機要多歷歲年才  
用未窮彌可嗟慟宜隆追遠以旌善人可贈侍  
中護軍將軍鼓吹一部給東園祕器朝服一具  
衣一襲喪事隨由資給謚曰簡子

又卹周捨詔

故侍中護軍將軍簡子捨義該玄儒博窮文史  
奉親能孝事君盡忠歷掌機密清貞自居食不  
重味身靡兼衣終亡之日內無妻妾外無田宅  
爾見卑貧有過古烈往者南司白渦之効恐外  
議謂朕有私致此黜免追愧若人一介之善外  
可量加褒典以旌善人

贈陸雲公手詔

給事黃門侍郎掌著作陸雲公風尚優敏後進  
之秀奄然殂謝良以惻然可尅日舉哀賻錢五  
萬布四十疋

贈丘仲孚詔

豫章周史主簿字重試大邦貴以後效非直悔  
吝若若若若若若若若若若若若若若若若若若  
贈給事黃門侍郎

卹何黠詔

新除侍中何黠栖遲衡泌白首不渝奄至殞喪  
倍懷傷惻可給第一品材一具賻財二萬布五  
十疋喪事所須內監經理



謚庾詵貞節處士詔

旌善表行前王所敦新野庾詵荆山珠玉江陵  
杞梓靜族南度固有名德獨貞苦節孤芳素履  
奄隨運往惻愴于懷宜謚貞節處士以顯高烈

贈臨川王宏詔

侍中太尉臨川王宏器宇冲貴雅量弘通爰初  
弱齡行彰素履逮於應務嘉猷載緝自皇業啓  
基地惟介弟久司神甸歷位台階論道登朝物  
無異議朕友于之至家國兼情方弘燮贊儀刑  
列辟天不憖遺奄焉不永哀痛抽切震慟于厥  
心宜增峻禮秩式昭懋典可贈侍中大將軍揚  
州牧假黃鉞王如故

贈南平王偉詔

旌德紀功前王令典慎終追遠列代通規故侍  
中中書令大司馬南平王偉器宇宏曠鑒式弘  
簡爰在弱齡清風載穆翼佐草昧勲高樊沔契  
濶艱難劬勞任寄及貸務論道弘茲袞職奄焉  
薨逝朕用震慟于厥心宜降寵命式昭戎典可  
贈侍中太宰王如故

贈鄱陽王恢詔

故使持節散騎常侍都督荆湘雍梁益寧南北  
秦八州諸軍事驃騎大將軍開府儀同三司荆  
州刺史鄱陽王恢風度開朗器情凝質爰在弱  
歲美譽克宣洎於從政嘉猷載緝方入正論道  
弘燮台階奄焉薨逝朕用傷慟于厥心宜隆寵  
命以申朝典可贈侍中司徒王如故

改封南昌公爲侯詔

庭堅世祀靡輟於宗周樂毅錫壤乃昭於洪漢  
齊故太尉南昌公舍韋履道草昧興齊謨明翊  
贊同符在昔雖子房之蔚爲帝師文若之隆比  
王佐無以尙也朕膺曆受圖惟新寶命莘莘玉  
帛升降有典永言前代敬惟徽烈匪直懋勲義  
兼懷樹可降封南昌縣公爲侯食邑千戶

齊世王侯降封詔

興運升降前代舊章齊世王侯封爵悉皆降省  
其有効著艱難者別有後命惟宋汝陰王不在  
除例

詔許慧詔

六中大夫王敬胤卒遺命不得設復魄  
旌旒一廬蔭籍下一枚覆上氣絕便沐  
浴藍輿載尸還槨中敬胤外甥  
甥許慧詔因阮碩以聞詔曰

敬胤令其息崇素氣絕便沐浴籍以二廬蔭鑿  
地周身歸葬忠侯此達生之格言賢夫玉匣石  
槨遠矣然子于父命亦有所從有所不從今崇  
素若信遺意土周淺薄屬辟不施一朝見侵狐  
鼠戮屍已甚父可以訓子子亦不可行之外內  
易棺此自奉親之情籍土而塋亦通人之意宜

兩捨兩取以達父子之志棺周於身土周于槨  
去其牲奠歛以時服一可以申情二可以稱家  
禮教無違生死無辱此故當爲安也



責蕭昱詔

昱表如此古者用人必前明試皆須續用既立  
乃可自選之高昔漢光武兄子章與二人並有  
名宗室就欲習吏事不遜章爲平陰令興爲緱  
氏宰政事有能方遷郡守非直政績見稱卽是  
光武猶子昱之才地豈得比類焉往歲處以淮  
南郡旣不肯行續用爲招遠將軍鎮北長史襄  
陽太守又以邊外致辭改除招遠將軍永嘉太  
守復云內地非願復間晉安臨川隨意所擇亦

復不行解巾臨郡事不爲薄數有致辭意欲何  
在且昱諸兄遷居連率相繼推轂未嘗缺歲其  
同產兄景今正居藩鎮朕豈厚於景而薄於昱  
正是朝序物議以第若斯於其一門差自無愧  
無論今日不得如此昱兄弟昔在布衣以處成  
長於何取立豈得任情反道背天違地孰謂朝  
廷無有恩章特是未欲致之於理旣表解職可  
聽如啓

蕭昱上武帝表附

憂初陳啓未垂採照追懷慙懼寔戰胸心臣  
聞暑雨和寒小人猶怨榮枯寵辱誰能忘懷  
臣措以往因得預枝戚之重緣報旣雜時逢  
坎壈之運昔在齊季義師之始臣乃幼弱粗  
有識慮東西阻絕歸赴無由雖未能負戈擐  
甲寔銜淚憤懣潛伏東境備履艱危首尾三  
年亟移數處雖復饑寒切身亦不以凍餒爲  
苦每涉驚疑惶怖失魄旣垂致命之節空有  
項領之憂希望開泰冀蒙共樂豈期二十餘

年功名無紀畢此身骸方填溝壑丹誠素願  
溢至長罷俯自哀憐能不傷歎夫自嫌自銜  
誠哉可鄙自譽自伐寔在可羞然量已揆分  
自知者審陳力就列寧敢空言是以常願一  
試屢誠干請夫上應玄象寔不易叨錦不輕  
裁誠難其製過去業鄣所以致乖莽測聖監  
旣謂臣愚短不可試川豈容久居顯禁徒穢  
黃樞忝竊稍積恐招物議請解今職乞屏退  
私門伏願天照特垂允許臣雖叨榮兩宮報

効無地方違省闊伏深戀悚

貴西豐侯正德詔

武帝初養正德爲子及生昭明正德還  
本心常怏怏爲輕車將軍奔魏復逃歸  
特復本封普通六年隨豫章王北侵  
樂軍委走下獄帝詔之從臨海郡

汝以猶子情兼常愛故越先汝兄剖符連郡往  
年在蜀昵近小人猶謂少年情志未定更於吳  
郡殺戮無辜劫盜財物雅然無畏及還京師專  
爲逋逃乃至江乘要道湖頭斷路遂使京邑士  
女早閉晏開又奪人妻妾略人子女徐敖非獨  
失其配匹乃橫屍道路王伯敖列卿之女誘爲

妾媵我每加掩抑冀汝自新了無悛革怨讐逾  
甚遂匹馬奔亡志懷反噬遣信慰問冀汝能還  
果能來歸遂我夙志謂汝不好文史志在武功  
令汝往節重戎前驅豈謂汝狠心不改包藏禍  
胎志欲覆敗國計以快汝心今當宥汝以遠無  
令虜累自隨勅所在給汝稟餼王新婦見理等  
皆停太尉聞汝餘虜累悉許同行

梁武帝御製集卷之七

梁高祖武皇帝蕭衍著

勅

手勅何胤

藝文載沈約爲高祖作但既係手勅應非代言

吾猥當期運膺此樂推而顧已蒙蔽昧於治道  
雖復劬勞日昃思致隆平而先王遺範尙蘊方  
策息舉之用存乎其人兼以世道澆暮爭詐繁  
起改俗遷風良有未易自非以儒雅弘朝高尙  
軌物則泪流所至莫知其限治人之與治身獨



善之與兼濟得失去取爲用孰多吾雖不學頗  
好博古尙想高座每懷擊節今世務紛亂憂責  
是常不得不屈道嚴阿共成世美必望深達往  
懷不吝濡足今遣領軍司馬王果宣旨諭意遲  
回在近

與何胤勅

高祖凡再勅胤於是遣何子朗等於東  
山受學胤以若邪迫隘不容生徒遷秦  
山

頃者學業淪廢儒術將盡閭閻搢紳尠聞好事

吾每思弘獎其風未移當處興言爲歎本欲屈卿暫出開導後生旣屬廢業此懷未遂延佇之勞載盈夢想理舟虛席須俟來秋所望惠然申其宿抱耳卿門徒中經明行脩厥數有幾且欲瞻彼堂堂寘此周行便可具以名聞副其勞望

又

比歲學者殊爲寡少良由無復聚徒故明經斯廢每一念此爲之慨然卿居儒宗兼以德素當勸後進有意向者就卿受業想思深誨誘使斯

文載興

又

胤兄黠率高  
祖勅與胤

賢兄徵君弱冠拂衣華首一操心遊物表不滯  
近跡脫落形骸寄之遠理性情勝致遇興彌高  
文會酒德撫際逾遠朕膺錄受圖思長聲教朝  
多君子既貴成雅俗野有外臣宜弘此難進方  
頰清徽式降大業昔在布衣情期早著資以仲  
虞之秩待以子陵之禮聽覽暇日角巾引見宵

然汾射茲焉有託一旦萬古良懷震悼鄉友于  
純至親從凋亡偕老之願致使反奪纏綿永恨  
伊何可任末矣柰何

勅照明太子

太子性至孝母喪水漿不入口每哭輒  
慟絕高祖遣顧協宣旨曰毀不滅性聖  
人之制禮不勝喪比於不孝齊我在那  
得自毀如此可卽強進飲食雖屢奉勅  
勸逼日進一溢  
不嘗菜果之味

聞汝所進過少轉就羸瘵我比更無餘病正爲  
汝如此胸中亦地塞成疾故應強加饘粥不使  
我恒爾懸心

勅報皇太子

武帝銳意儒雅疎簡刑獄姦吏招權巧  
文并法簡文爲皇太子春宮視事見而  
懲之乃上疏帝手  
勅報之竟弗之從

頃年以來處處之役惟資徒謫逐急充配若科  
置繁細義同簡約切須之處終不可得引例興  
訟紛紜方始防杜姦巧自是爲難更當別思取  
其便也

答皇太子請御講勅

省啓欲須吾講其汝等意書云一日二日惟日  
萬機今復過之年耆根熟氣力衰耗荷此黼宸  
有踰重負日中或得一食或不得食周旦吐握  
未足爲勞楚君盱食方今非切未明求衣聿來  
弗休晝勞夜思精華已竭數術多事未獲垂拱  
兼國務靡寄豈得坐談須道行民安乃當議耳  
越勅

又

省重啓猶欲須吾講說具汝等所懷亦不異前  
答緣邊未入國度多乏如是等事恒須經計其  
餘繁碎非可具言率土未寧菜食者衆兼款附  
相繼實與未周怨望者多懷音者少漢世渾并  
賈誼亦且流慟魏室無虞楊阜猶云可悲况今  
飛牙腹心不貳之臣又論道帷幄之士四聰不  
聞八達路擁王侯雖多維城靡寄晝厲夕惕如  
履霜亦以朽索馭六馬豈足爲喻詩不云乎知  
我者謂我心憂不知我者謂我何求方今信非



談曰汝等必欲爾者自可令諸僧於重雲中講  
道義也越勅

又

省汝等啓復具所懷汝等未達稼穡之艱難安  
知天下負重庸主少君所以繼踵顛覆嘗出安  
不思危况復未安者耶殷鑒不遠在於前代吾  
今所行雖異曩日但知講說不憂國事則與彼  
人異術同亡易言其亡繫于苞桑斯則乾乾夕  
惕僅而後免汝等思之一二具如前勅越勅

答晉安王請開講啓勅

省啓具汝所懷法事旣善豈不欣然吾內外衆  
緣憂勞紛總食息無暇廢事論道是所未遑汝  
便爲未體國也越勅

答晉安王謝開講般若啓勅

省啓具之爲汝講金字般若波羅蜜經發題始  
覓四衆雲合華夷畢集連雨累日深慮廢事景  
物開明幽顯同慶寔相之中本無去來身雖不  
到心靡不在善自調養慎勿牽勞尚有兩旬日  
數猶奢今雖不同後會未晚也吾始還臺不復  
多勅越勅

答菩提樹頌手勅

省啓覽所上菩提樹頌據採致佳辭味清淨仰  
讚法王稱歎道樹意思口說乃至手書極得三  
業之善但所言國美皆非事寔不無綺語過也  
越勅

答晉安王謝幸善覺寺啓勅

汝所營建慈悲寶刹諸佛威神不營多功纔欲  
運力卽便豎立幽顯欣仰我亦隨喜不得與汝  
同共瞻拜此以爲恨耳越勅

勅貞陽侯淵明

武帝既納侯景大舉北侵以淵明都督諸軍趣彭城淵明師次呂梁作塞山堰以灌彭城水及于堦魏遣將赴救兵敗被執

侯景志清鄴洛以雪讐恥其先率大軍隨機撫定汝等衆軍可止於塞山築堰引清水以灌彭城大水一沈孤城自殄慎勿妄動

手勅劉之遴

之遴領步兵校尉出爲郢州行事意不願出固辭高祖手勅遂爲有司奏免

朕聞妻子具孝衰於親爵祿具忠衰於君卿旣內廷理忘奉公之節

賜陸倕勅

太子中舍人陸倕所製石闕銘辭義典雅足爲  
佳作昔虞丘辨物邯鄲獻賦賞以金帛前史美  
談可賜綢三十疋



手勅張率

率爲司徒謝朓掾直文德待詔  
省奏待詔賦高祖手勅答之

省賦殊佳相如工而不敏枚臯速而不工卿可  
謂兼二子於金馬矣

責賀琛劾

琛遷散騎常侍是時皆緣飾姦諂深害時政琛遂啓陳事條封奏高祖大怒召主書口授勅責琛琛但謝過不敢復有措斥

審審有聞殊稱所期但朕有天下四十餘年公車讜言見聞聽覽所陳之事與卿不異常欲承用無替懷抱每苦倥偬更增惛惑卿珥貂紆組博問洽聞不宜同於關葦止取名字宣之行路言我能上事明言得失恨朝廷之不能用或誦離騷蕩蕩其無人遂不御乎千里或誦老子知

我者希則我貴矣如是獻替莫不能言正旦獻  
罇皆其人也卿可分別言事啓乃心沃朕心卿  
云今北邊稽服政是生聚教訓之時而民失安  
君牧守之過朕無則哲之知觸向多弊四聰不  
開四明不達內省責躬無處逃咎堯爲聖主四  
凶在朝况乎朕也能無惡人但大澤之中有龍  
有蛇縱不盡善不容皆惡卿可分明顯出某刺  
史橫暴某太守貪殘某官長凶虐尚書蘭臺主  
書舍人某人姦猾某人取與明言其事得以黜

陟向令舜但聽公車上書四凶終自不知堯亦  
求爲閭主卿又云東境戶口空虛良由使命繁  
多但未知此是何使卿云驚困邑宰則拱手聽  
其漁獵桀黠長吏又因之而爲貪殘並何姓名  
庶平掣肘復是何人朝廷思賢有如饑渴廉平  
掣肘寔爲異事宜速條聞當更擢用凡所遣使  
多由民訟或復軍糧諸所飢急蓋不獲已而遣  
之若不遣使天下枉直云何綜理事寔云何濟  
辦惡人日滋善人日蔽欲求安卧其可得乎不

遣使而得事理此乃佳事無足而行無翼而飛  
能到在所不威而伏豈不幸甚卿旣言之應有  
深見宜陳秘術不可懷寶迷邦卿又云守宰貪  
殘皆由滋味過度貪殘糜費已如前答漢文雖  
愛露臺之產鄧通之錢布於天下以此而治朕  
無愧焉若以下民飲食過差亦復不然天監之  
初思之已甚其勤力營產則無不富饒惰游緩  
事則家業貧窶勤修產業以營盤案自己營之  
自己食之何損於天下無賴子弟惰營產業致

於貧窶無可施設此何益於天下且又意雖曰  
同富富有不同慳而富者終不能設奢而富者  
於事何損若使朝廷緩其刑此事終不可斷若  
急其制則曲屋密房之中云何可知若家家搜  
檢其細已甚欲使吏不呼門其可得乎更相恐  
脅以求財帛是長禍萌無益治道若以此指朝  
廷我無此事昔之牲牢久不宰殺朝中會同菜  
蔬而已意粗得奢約之節若復減此必有蟋蟀  
之譏若以爲功德事者皆是園中之所產育功

德之事亦無多費變一瓜爲數十種食一菜爲數十味不變瓜菜亦無多種以變故多何損於事亦毫芥不關國家如得財如法而用此不愧乎人我自除公宴不食國家之食多歷年稔乃至官人亦不食國家之食積累歲月凡所營造不關材官及以國匠皆資僱借以成其事近之得財頗有方便民得其利國得其利我得其利營諸功德或以卿之心度我之心故不能得知所得財用暴於天下不得曲辭辯論卿又云女

妓越濫此有司之責雖然亦有不同貴者多畜  
妓樂至於黜附若兩掖亦復不聞家有二八多  
畜女妓者此並宜具言其人當令有司振其霜  
豪卿又云乃追恨所取爲少如復傳與增其搏  
噬一何悖哉勇怯不同食廩各用勇者可使進  
取怯者可使守城貪者可使捍禦廉者可使牧  
民向使叔齊守於西河豈能濟事吳起畜民必  
無成功若使吳起而不重用則西河之功廢今  
之文武亦復如此取其搏噬之用不能得不重



更任彼亦非爲朝廷爲之傳翼卿以朝廷爲悖  
乃自甘之當思致悖所以卿云宜導之以節儉  
又云至治者必以淳素爲先此言大善夫子言  
其身正不令而行其身不正雖令不從朕絕房  
室三十餘年無有淫佚朕頗自計不與女人同  
屋而寢亦三十餘年至於居處不過一床之地  
雕飾之物不入於宮此亦人所共知受生不飲  
酒受生不好音聲所以朝中曲宴未嘗奏樂此  
群賢之所觀見朕三更出理事隨事多少事少

或中前得竟或事多至日晏方得就食日常一食若晝若夜時疾苦之日或亦再食昔腰腹過於十圍今之瘦削裁二尺餘舊帶猶存非爲妄說爲誰爲之救物故也書曰股肱惟人良臣惟聖向使朕有股肱可得申主今乃不免居九品之下不令而行徒虛言耳卿今慙言便罔知所答卿又云百司莫不奏事詭競求進此又是誰何者復是說事今不使外人呈事於義可否無人廢職職可廢乎職廢則人亂人亂則國安乎

以咽廢殮此之謂也若斷呈事誰尸其任專委  
之人云何可得是故古人云專聽生姦獨任成  
亂猶二世之委趙高元后之付王莽呼鹿爲馬  
卒有閹樂望夷之禍王莽亦終移漢鼎卿云吹  
毛求疵復是何人所吹之疵譬肌分理復是何  
人乎事及深刻繩逐並復是誰又云治署邸肆  
何者宜除何者宜省國容戎備何者宜省何者  
未須四方屯傳何者無益何者妨民何處興造  
而是役民何處費財而是非急若爲討召若爲

徵賦朝廷從來無有此事靜息之方復何者宜  
各出其事具以奏聞卿云若不及於時大息其  
民事至方圖知無及也如卿此言即時便是大  
役其民是何處所卿云國弊民疲誠如卿言終  
須出其事不得空作漫語夫能言之必能行之  
富國彊兵之術急民省役之宜號令遠近之法  
並宜具列若不具列則是欺罔朝廷空示頰舌  
凡人有爲先須內省惟無瑕者可以戮人卿不  
得歷詆內外而不極言其事佇聞重奏當後省

覽付之尚書班下海內庶亂卒永除害焉長息  
惟新之美復見今日

梁武帝御製集卷之八

梁高祖武皇帝蕭衍著

勅

勅答臣下神滅論

位現致論要當有體欲談無佛應設賓主標其  
宗旨辨其短長來就佛理以屈佛理則有佛之  
義既顯神滅之論自行豈有不求他意妄作異  
端運其隔心鼓其騰口虛畫瘡痂空致詆訶篤  
時之蟲驚疑於往來滯斃之龜河漢於遠大其

故何也淪蒙怠而爭一息抱孤陋而守井轅豈  
知天地之長久溟海之壯濶孟軻有云人之所  
知不如人之所不知信哉觀三聖設教皆云不  
滅其文沿傳難可具載止舉二事試以爲言祭  
義云惟孝子爲能饗親禮運云三日齊必見所  
祭若謂饗非所饗見非所見違經背親言語可  
息神滅之論朕所未詳

勅光祿大夫江倩

倩子經幼有孝性父患眼經夢一僧云  
飲慧眼水必差及覺莫能解者草堂寺  
智者法師曰無量壽經云慧眼見真能  
渡彼岸倩乃格捨同安縣界牛屯里舍  
爲寺乞賜嘉名勅答云云及就創造泄  
故井井水清冽依夢取水洗眼及煮藥  
痊差時人  
謂之孝感

純臣孝子往往感應晉世顏含遂見冥中送藥  
近見智者知卿第二息感夢云慧眼水慧眼則  
是五眼之一號若欲造寺可以慧眼爲名



勅沈約撰佛記序

去歲令虞闡等撰佛記并令作序序體不稱煩  
治改猶未盡致尋佛教因三假以寄法藉二諦  
以明理達相求宗不著會道論其旨歸似未至  
極乃不應以此相煩亦是一途善事可得爲厝  
筆不以故指勅闡等結序未體又似小異

與周捨論斷肉勅

法寵所言慚愧而食衆生此是經中所明羅刹  
婦女云我念汝我食汝法寵此心卽是經之羅  
刹

又

僧辯所道自苑肉若如此說鴟鴞鳩鵲觸處不  
死那不見有一自苑者麀鹿雉兔充滿野澤亦  
不曾見有一自苑者而覓苑肉其就屠殺家覓  
苑魚必就醫網處若非殺生豈有苑肉經言覓

肉與自殺此罪一等我本不自爲正爲諸僧尼  
作離苦因緣

又

衆生所以不可殺生凡一衆生具八萬戶蟲經  
亦說有八十億萬戶蟲若斷一衆生命卽是斷  
八萬戶蟲命自死衆生又不可食者前所附蟲  
雖已滅謝後所附蟲其數復衆若煮若炙此斷  
附蟲皆無復命利舌端少味害無量衆生其中  
小者非肉眼能觀其中大者灼然共見滅慈悲

心增長惡毒此實非沙門釋子所可應行

又

袈僧食肉罪劇白衣白衣食肉乃不免地獄而止是一罪至於袈僧食肉既犯性罪又傷戒律以此爲言有兩重罪若是學問袈僧食肉者此爲惡業復倍於前所以如此既親達經教爲人講說口稱慈悲心懷毒害非是不知知而故犯言行既違卽成詭妄論學問人食肉則罪有三重所以貴於解義正爲如說修行反復噉食魚

肉侵酷生類作惡知識起衆怨對墜墜地獄疾  
於讚不善惡報應必也不亡凡出家人實宜深  
思

又

聲聞受律儀戒本制身口七支一受之後乃至  
睡眠闕等律儀恒生念念得未曾有律儀所以  
爾者睡眠等非起惡心故不損不失乃至常生  
若起欲殺心於聲聞法雖不失身口戒而於戒  
有損非唯損不殺戒亦蕪汙餘戒至於手挾齒

齧動身日業則失身日戒爾時律儀無作卽斷  
不續旣失不殺戒亦損汙餘戒所以爾者旃陀  
羅人爲屠肉時爲何等人殺正爲食肉者若食  
肉者卽有殺分於不殺戒卽成有缺若謂於善  
律儀受殺生分於不殺戒無所缺者是不善律  
儀人持八戒齋是惡律儀猶應相續若惡律儀  
人持八戒齋惡律儀不復相續者是知善律儀  
人受諸殺分是不殺戒卽時便缺別解脫戒不  
復解脫惡律儀人無論持八戒齋但起一念善

心惡律儀卽斷若一念不斷多念亦應不斷若  
多念斷是知一念時斷善律儀人其事亦爾無  
論受諸殺分有少殺分不殺律儀卽時亦斷菩  
薩人持心戒故自無有食衆生理若缺聲聞戒  
絡不免地獄等苦

答曹思文勅

具一二續旣背經以起義乖理以致談滅聖難以聖責乖理難以理詰如此則言語之論略咸可息



喻智藏勅

求空自開依空入慧高蹈養神寔是勝樂不違  
三乘亦以隨喜惟別之際能無恨然岐路贈言  
古人所重猶勸法師行無礙心大悲爲首方便  
利益隨時用舍不宜頓杜以隔礙心行菩薩道  
無有是處

釋智藏啓辭武帝附

夙昔顧省心或不調欲依佛一語於空閒自  
制而從緣流二十餘載在乎少壯故可推斥

今既老病身心俱減若復退一毫便不堪自  
課故願言靜處少自榮衛非敢傲世求名非  
欲從閑自誕特是常人近情懼前途之已迫  
耳

勅答釋明徹

徹受學僧祐隨出陽都住建初寺天監  
初自荊州還都二宮問供饗暑優洽遽  
疾將卒奉表告  
辭武帝答之

省疏增其憂耿人誰不病何以遽終過甚法師  
至性堅明道行純備往來淨土去留安養方除  
四魔理無五畏惟應正念諸佛不捨大願與般  
若相應直至種智發菩提心彼我相攝方結來  
緣敬如所及菩薩行業非千百年善思至理勿  
起亂想覽筆悽慙不復多云

勅答僧正南淵寺沙門慧超

齊隆寺法鏡師  
啓釋法寵鎮之勅曰

法寵法師造次舉動不逾律儀不挾性欲不事  
形勢慈仁靜悌雅有君子之風匡政寺廟信得  
其人矣

制

與群臣論明堂制

明堂堆大戴禮九室八牖三十六戶以茅蓋屋  
上圓下方鄭玄據援神契亦云上圓下方又云  
八窗四達明堂之義本是祭五帝神九室之數  
未見其理若五堂而言雖當五帝之數向南則  
背叶光紀向北則背赤燁怒東向西向又亦如  
此於事殊未可安且明堂之祭五帝則是總義  
在郊之祭五帝則是別義宗祀所配復應有室

若專配一室則是義非配五若皆配五則便成五位以理而言明堂本無有室

又制

朱异以月令天子居明堂左右个聽朔  
既在明堂今若無室則於義成闕帝又  
曰制

若如鄭玄之義聽朔必在明堂於此則人神混淆莊敬之道有廢春秋云介居二大國之間此言明堂左右个者謂所祀五帝堂之南又有小室亦號明堂分爲三處聽朔既三處則有左右

之義在營域之內明堂之外則有个名故曰明  
堂左右个也以此而言聽朔之處自在五帝堂  
之外人神有別差無相干

駁慈母服議制

禮言慈母凡有三條一則妾子之無母使妾之  
無子者養之命爲母子服以三年喪服齊衰章  
所言慈母是也二則嫡妻之子無母使妾養之  
慈撫隆至雖均乎慈愛但嫡妻之子妾無爲母  
之義而恩深事重故服以小功喪服小功章所  
以不直言慈母而云庶母慈已者明異於三年  
之慈母也其三則子非無母正是擇賤者視之  
義同師保而不無慈愛故亦有慈母之名師保



既無其服則此慈亦無服矣內則云擇於諸母  
與可者使爲子師其次爲慈母其次爲保母此  
其明文此言擇諸母是擇人而爲此三母非調  
擇取兄弟之母也何以知之若是兄弟之母其  
先有子者則是長妾長妾之禮寔有殊加何容  
次妾生子乃退成保母斯不可也又有多兄弟  
之人於義或可若始生之子便應三母俱闕邪  
由是推之內則所言諸母是謂三母非兄弟之  
母明矣子游所問自是師保之慈非三年小功

之慈也故夫子得有此對豈非師保之慈母無服之證乎鄭玄不辯三慈混爲訓釋引彼無服以注慈已後人致謬實此之由經言君子子者此雖起於大夫明大夫猶爾自斯以上彌應不異故傳云君子子者貴人之子也總言曰貴則無所不包經傳互文相顯發則知慈加之義通乎大夫以上矣宋代此科不乖禮意便加除削良是所疑

周捨等慈母服議附

賀彥先稱慈母之子不服慈母之黨婦又不  
從夫而服慈姑小功服無從故也庾蔚之云  
非徒子不從母而服其黨孫又不從父而服  
其慈由斯而言慈祖母無服明矣尋門內之  
哀不容自同於常按父之祥禫子並受弔今  
二王諸子宜以成服日單衣一日爲位受弔  
制曰二王在遠諸子宜攝祭事捨又曰禮云  
縞冠玄武子姓之冠則世子衣服宜異於常  
可著細布衣絹爲領帶三年不聽樂又禮及

春秋庶母不世祧蓋謂無王命者耳吳太妃  
既朝命所加得用安成禮秩則當祔廟五世  
親盡乃毀陳太妃命數之重雖則不異慈孫  
既不從服廟食理無傳祀子祭孫止是曾經  
文高祖因是敕禮官議皇子慈母之服筠議  
宋朝五服制皇子服訓養母禮依庶母慈已  
宜從小功之制按曾子問云子游曰喪慈母  
禮歟孔子曰非禮也古者男子外有傳內有  
慈母君命所使教子也何服之有鄭玄注云

此指謂國君之子也若國君之子不服則王者之子不服可知又喪服經云君子子爲庶母慈已者傳曰君子子者貴人子也鄭玄引內則三母止施於卿大夫以此而推則慈母之服上不在五等之嗣下不逮三士之息儻其服者止卿大夫尋諸侯之子尚無此服况乃施之皇子謂宜依禮刊除以反前代之惑

唱斷肉經竟制

諸僧道諸小僧輩看經未遍互言無斷肉語今  
目此經言何所道所以唱此革屣文者本意乃  
不在此正爲此三十三日法雲法師講涅槃斷  
肉事于時僧正慧超法寵法師難云若經文究  
竟斷一切肉乃至自死不得食者此則同尼乾  
斷皮革不得著革屣若開皮革得著革屣者亦  
應開食肉法雲法師乃已有通釋而二法師難  
意未了于時自仍通云若是聖人故自不著此

物若中行人亦不著此著此皆是下行人所以  
不同尼乾者諸有所舍若無麻紵之鄉亦有開  
皮革義論有麻紵處大慈者乃實應不著但此  
事與食肉不得頓同凡著一革屣經久不壞若  
食噉衆生就一食中便害無量身命況日日餐  
咀數若恒沙亦不可得用革屣以並斷肉于時  
諸僧乃無復往復恐諸小僧執以爲疑方成巨  
弊所以唱此不受革屣文正欲釋一日所疑非  
關前制凡噉肉者是大罪障經文道昔與衆生

經爲父母親屬聚僧那不思此猶恐食噉衆生  
已不能投身餓虎割肉貿麝云何反更噉他身  
小諸僧及領徒聚法師諸尼及領徒聚者各還  
本寺宣告諸小僧尼令知此意



冊

謚始興王冊

咨故侍中司徒驃騎將軍始興王夫忠爲令德  
武謂止戈于以用之載在前志王有蒞命之元  
勲利民之厚德契濶二紀始終不渝是用方軌  
往賢稽擇故訓鴻名美義允臻其極今遣兼大  
鴻臚程爽謚曰忠武魂而有靈歆茲顯號

璽書

賜左丞范鎮璽書

王亮仕齊義師至新林百官皆遠誠款  
亮獨不遣高祖踐祚授侍中中書監元  
日朝會亮辭疾不登殿設饌別省語笑  
自若詔廢爲庶人復下璽書詰鎮鎮答  
支離而已

亮少乏才能無聞時輩昔經冒入群英相與豈  
薄晚節諂事江拓爲吏部未協附梅蟲兒茹法  
珍遂執昏政此屋摧禍盡家塗炭四海沸騰天  
下橫潰此誰之咎食亂君之祿不死於治世亮

協固鹵黨作威作福靡衣玉食女樂盈房勢危  
事逼自相吞噬建石首題啓靡請罪朕錄其白  
旗之來貫其既往之咎亮反覆不忠姦賄彰暴  
有何可論妄相談述具以狀對

梁武帝御製集卷之九

梁高祖武皇帝蕭衍著

令

霸府去苛令

夫樹以司牧非役物以養生視人如傷豈肆上  
以縱虐廢主棄常自絕宗廟窮凶極悖書契未  
有征賦不一苛酷滋章緹繡土木菽粟犬馬徵  
發閭左以充繕築流離寒暑繼以疫厲轉死溝  
渠曾莫救恤朽肉枯骸烏鳶是厭加以天災人

火屢焚宮掖官府臺寺尺椽無遺悲甚忝離痛  
薰麥秀遂使億兆離心疆徼侵弱斯人何辜離  
此塗炭今明昏迤邐大道公行思治之氓來蘇  
茲日猥以寡薄屬當大寵雖運距中興艱同草  
昧思闡皇休與之更始凡昏制謬賦滯刑濫役  
外可詳檢前源悉皆除蕩其主守散失諸所損  
耗精立科條咸從原例

霸府禁令

夫在上化下草偃風從世之澆淳恒由此作自  
求元失德書契未紀窮凶極悖焉可勝言旣而  
璇室外構傾宮內積竒技異服殫所未見上慢  
下暴淫侈競馳國命朝權政移近習販官鬻爵  
賄貨公行並甲第康衢漸臺廣室長袖低昂等  
和戎之賜珍羞百品同伐冰之家愚人因之浚  
以成俗驕豔競爽夸麗相高至乃市井之家貂  
狐在御工商之子緹繡是襲自入之次夜分未

反昧爽之朝期之清旦聖明肇運厲精惟始雖  
曰纘戎殆同創革且滯費之後繼以興師巨橋  
鹿莖凋罄不一孤忝荷大寵務在澄清思所以  
仰述皇朝大帛之旨俯厲微躬鹿裘之義解而  
更張斲雕爲樸自非可以奉案盛脩綬冕習禮  
樂之容繕甲兵之備此外衆賈一皆禁絕御府  
中署量宜罷省掖庭備御妾之數大饗絕鄭衛  
之音其中有可以率先卿士堆的昨庶菲食薄  
衣請自孤始加群才並軌九官咸事若能人務

退食競存約已移風易俗庶幾月有成昔毛玠  
在朝士大夫不敢靡衣偷食魏武歎曰玠之法  
不如毛尚書玠雖德謝往賢任重先達寔望多  
士得其此心外可詳爲條格



閱武堂大赦令

皇家不造，遭此昏凶禍，挺動值虐，被人鬼社廟  
之危螽，焉如綴吾身，藉皇宗曲，荷先顧，受任邊  
疆，惟轂萬里，眷言瞻烏，痛心在目，故率其尊主  
之情，厲其忘生之志，雖寶曆重升，明命有紹，而  
獨夫醜縱，方燦京邑，投袂援戈，克弭多難，虐政  
橫流，爲日旣久，同惡相濟，諒非一族，仰稟朝命，  
任在專征，思播皇澤，被之率土，凡厥負臚，咸與  
惟新，可大赦天下，唯王咥之等四十一人不在。

多士列傳

卷九

四

赦例

申飭刑政令

永元之季乾維落紐政寔多門有殊衛文之代  
權移於下事等曹恭之時遂使閹尹有翁媼之  
稱高安有法堯之旨鬻獄敗官銅山護澤開塞  
之機奏成小醜直道正義擁抑彌年懷冤抱理  
莫知誰訴姦吏因之筆削自己豈直賈生流涕  
許伯哭時而已哉今理運惟新政刑得所矯革  
流弊寔在茲日可通榆尚書衆曹東昏時諸諍  
訟失理及主者淹停不時施行者精加訊辨依

梁武帝集

卷九

五

事議奏

初封梁王下國中恩令

孤以虛昧任執國鈞雖夙夜勤止念在興治而  
育德振民邈然尚遠聖朝永言舊式隆此眷命  
侯伯盛典方軌前烈嘉錫隆被禮數昭崇徒守  
愿節終隔體諒群后百司重茲散獎勉茲厚顏  
當此休祚望昆彭以長想欽桓文而歎息思弘  
政塗莫知津濟邦甸初啓藩宇惟新思覃嘉慶  
被之下國國內殊死以下今月十五日昧爽以  
前一皆原赦鰥寡孤獨不能自存者賜穀五斛

府州所統亦同蠲蕩

掩骼令

朱魯之捷逆徒逆歿者特許家人殯塋若無親屬或有貧苦二縣長尉卽爲埋掩建康城內不達天命自取淪滅亦同此科

檄

移京邑檄

夫道不常夷時無永化險泰相泐晦明非一皆  
屯困而後亨資多難以啓聖故昌邑悖德孝宣  
聿興海西亂政簡文升歷並拓緒開基紹隆寶  
命理驗前經事昭往策獨夫擾亂天常毀棄君  
德姦回滯縱歲月滋甚挺虐於髻翦之年植險  
於髻卵之日猜忌凶毒觸途而著暴戾昏荒興  
事而發自大行告漸喜容前見梓宮在殯覲無



哀色懽娛遊宴有過平常奇服異衣更極誇麗  
至於選采妃嬪姊妹無別招待巾櫛姑姪莫不  
掖庭有裨販之名姬姜被干戈之服至乃形體  
宣露褻衣顛倒斬斫其間以爲歡笑騁肆淫放  
驅屏郊邑老弱波流士女塗炭行產盈路輿尸  
竟道母不及抱子不遑哭劫掠剽虜以日繼夜  
晝伏宵遊曾無休息淫醜營肆酣歌壙邸寵恣  
愚豎亂惑妖嬖梅蟲兒茹法珍滅獲厮小專制  
威柄誅翦忠良屠滅卿宰劉鎮軍舅氏之尊盡

忠奉國江僕射外戚之重竭誠奉上肅領軍葭  
莩之宗志存柱石徐司空沈僕射攝紳冠冕人  
望攸歸或渭陽餘感或勲庸允穆或誠著艱難  
或劬勞王室並受遺託同參顧命送往事居俱  
竭心力宜其慶溢當年祚隆後裔而一朝齋粉  
孩稚無遺人神怨結行路嗟憤肅令君忠公幹  
伐誠貫幽顯往年寇賊遊魂南鄭危逼拔刃飛  
泉孤城獨振及中流逆命憑陵京邑謀猷禁省  
捐授群帥尅翦鯨鯢清我王度雋慧景奇鋒迅

駭兵交象魏武力喪魂義夫奪膽投名送款比  
屋交馳負糧景從愚智競赴復誓旅江旬奮不  
顧身獎厲義徒電掩彊敵尅殲大憝以固皇基  
功出桓文勲超伊呂而勞謙省已事昭心迹功  
遂身退不祈榮滿敦賞未聞禍酷適及預稟精  
靈孰不冤痛而群孽放命蜂螫懷毒乃遣劉山  
陽驅扇逋逃招逼亡命潛圖密構燧見掩襲蕭  
右軍夏侯征虜忠斷夙舉義形於色奇謀宏振  
應手梟懸天道禍淫罪不容戮至於悖禮違教

傷化虐人射天彈路北之猶善裂胎斷脛方之  
非酷盡寓縣之竹未足紀其過窮出澤之兔不  
能書其罪自草昧以來圖牒所記昏君暴后未  
有若斯之甚者也旣人神乏主宗稷阡危海內  
沸騰旼庶板蕩百性懍懍如崩厥角蒼生喁喁  
投足無地幕府荷眷前朝義均休戚上懷委付  
之重下惟在原之痛豈可卧薪引火坐觀傾覆  
至尊體自高宗特鍾慈寵明並日月粹昭靈神  
祥啓元龜符驗當璧作鎮陝藩化流西夏謳歌

攸奉萬有樂推右軍蕭穎胄征虜將軍夏侯詳  
並同心翼戴卽宮舊楚三靈再朗九縣更新升  
平之運此焉復始康哉之盛在乎茲日然帝德  
雖彰區宇未定元惡未黜天邑猶梗仰慕宸規  
率前啓路卽日遣冠軍竟陵內史曹景宗等二  
十軍主長槩五萬驥驟爲群鸚視爭先龍驤並  
驅步出橫江直指朱雀長史冠軍將軍襄陽太  
守王茂率三十軍主戈船七萬乘流電激推鋒  
扼險斜趣白城南中郎諮議參軍軍主蕭偉等

三十九軍主巨艦迅楫衝波噓水旗鼓八萬焱  
集石頭南中郎諮議參軍軍主蕭憺等四十二  
軍主熊羆之士甲楯十萬沿江波馳艦掩據新亭  
益州刺史劉季連梁州刺史柳惔司州刺史王  
僧景魏興太守裴師仁上庸太守韋叡新城太  
守崔僧季並肅奉明詔襲行天罰蜀漢果銳沿  
流而下淮汝勁勇望波遙驚幕府總率貔貅驍  
勇百萬繕甲燕弧屯兵異馬縱金沸地鳴鞞聒  
天霜鋒曜日朱旗絳寓方舟千里駱驛係進蕭

右軍訐謨上才蕪資文武英略峻遠執鈞匡世  
擁荆南之袞腎四方之師宣讚申權奉衛輿輦  
於麾所指威稜無外龍驤獸步並集建業黜放  
愚狡均禮海昏廓清神甸掃定京宇譬猶崩泰  
山而壓蟻壤決懸河而注燂燼豈有不殄滅者  
哉今資斧所加止桷蠱兒茹法珍而已諸君或  
世胄羽儀書勲王府昔俛眉姦黨受制函威若  
能因變立功轉禍爲福並誓河岳永紆青紫若  
執迷不悟距逆王師大衆一臨刑茲罔赦所謂

火烈高原芝蘭同泯勉求多福無貽後悔賞罰  
之科有如白水



表

申飭選人表

臣聞以言取士士飾其言以行取人人竭其行  
所謂才生於代窮達惟時而風流遂往馳騫成  
俗媒孽夸衒利盡錐刀遂使官人之門肩摩轂  
擊豈直暴蓋露冠不避寒暑遂乃戢屨杖策風  
雨必至良由鄉舉里選不師古始稱肉度骨遺  
之管庫加以山河梁畢闕輿徵之恩金張許史  
忘舊業之替吁可傷哉且夫譜牒訛誤詐僞多

緒人物雅俗莫肯留心是以冒襲良家卽成冠  
族妄脩邊幅便爲雅士負俗深累遽遭寵擢墓  
木已拱方被微榮故前代選官皆立選簿應在  
貫魚自有銓次胄籍升降行能臧否或素定懷  
抱或得之輿論故得簡通賓客無事掃門頃代  
陵夷九流乖失其有勇退忘進懷質抱真者選  
部或以未經朝謁難於進用或有晦善藏聲自  
埋衡華又以名不素著絕其階緒必須畫刺投  
狀然後彈冠則是驅迫庶撫獎成澆競愚謂自

今選曹宜精隱括依舊立簿使冠履無爽名寔  
不違庶人識唯涖涖造請自息且聞中間立格卑  
族以二十登仕後門以過立試吏求之愚懷抑  
有未達何者設官分職惟才是務若八元立年  
居阜隸而見抑四凶弱冠處鼎族而宜甄是則  
世祿之富無意爲善布衣之士肆心爲惡豈所  
以弘獎風流希向後進此寔巨蠹尤宜刊革不  
然將使周人有路傍之泣晉臣興漁獵之歎且  
俗長浮競人寡退情若限歲登朝必增年就宦

故貌寔昏童籍已踰立滓穢名教於斯爲甚臣  
總司內外憂責是任朝政得失義不容隱伏願  
陛下垂聖淑之姿降聽覽之末則彝倫自穆憲  
章惟允

請徵補謝朓何胤表

夫窮則獨善達以兼濟雖出處之道其揆不同  
用捨惟時賢哲是蹈前新除侍中太子少傅朓  
前新除散騎常侍太子詹事都亭侯胤羽儀世  
胄徽猷冠冕道業德聲康濟雅俗昔居朝列素  
無宦情賓客簡通公卿罕預簪紱未禡而風塵  
擺落且文宗儒肆互居其長清規雅裁兼擅其  
美並達照深識預覩亂萌見庸質之如初知貽  
厥之無寄拂衣東山耿絕塵軌雖解組昌運寔

避昏時家膺鼎食而甘茲橡艾世襲青紫而安  
此懸鶉自澆風肇扇用南成俗淳流素軌餘烈  
頗存誰其激貪功歸有道康俗振民朝野一致  
雖在江海而勲同魏闕今泰運甫開賤貧爲恥  
況乎久蘊瑚璉暫厭承明而可得求志海隅永  
追松子臣負荷殊重叅贊萬機寔賴群才共成  
棟榦思挹清源取鏡止水愚欲屈居僚首朝夕  
諮諏庶足以翼宣寡薄式是王度